

# Gvangjsih Minzczu Bau

Cawjguen: Gvangsiah Bouxcuengh Swcigh Minzczu Cunghgyau Swvu Veijyenzei

Cawjbanh: Gvangsiah Minzczu Bause

Geiz neix 8 banj

广西民族报 Aenhauh okbanj: CN45-0036

B.2025

Nd.4 Ng.30

Liggaeuq ietceih nienz ndwenseiq cosam Geizsoq: Gungh daih 3666 geiz

## Aen Hoih Yienhcieingz Aen Hengzdoengh Hwngh Bien Fouqminz Youq Yinznanz Dwnghzcungh Hai

4 nyied 25 hauh daengz 26 hauh, Guekgya Minzveij youq Yinznanz Dwnghzcungh hai Aen Hoih Yienhcieingz Aen Hengzdoengh Hwngh Bien Fouqminz, Guekgya Minzveij cujyin Banh Yoz camgya haihoih caemhcaiq gangjvah, Yinznanz Swngjveij suhgi Vangz Ningz camgya haihoih caemhcaiq gangjvah.

Banh yoz ceijok, Cibbet Daih Dangj doxdaeuj, Dangjuncunghyangh aeu Siz Ginbingz dungzci guh goek baij gyaak ceihleix bien'gyaiq youq diegvih engq yienhda, guh'ok baenz-roix lwnhduenq youqgaenj caeuq anbaiz baijbouh hungnaek, doinyoengx aen hengzdoengh hwngh bien fouq minz seizdaih moq aeundaiej cingzci ronghsag. Dieg bien'gyaiq ginghci cungjliengh yat hwnj mbaek moq, aen gapgyaq canjnieb gaij ndei swnggaep, bien'gyaiq haifat hai-cuengq suijbingz onjyamq lai sang, yienghsienq singzmbanj bienqvaq hungloet, gak cuz bouxmiz gwndaen

lai ndei, gij eiqsik Cunghvaz Minzczu ranz vunz ndeu mboujduenh couqmaenh, yienh ok yiengh buenz ndei "dangj ciuq rongh bien'gyaiq, sim bouxminz bien'gyaiq coh dangj".

Banh Yoz daegbied gangj daengz, aeu haeujlaeg doekguh aen swhsienq youqgaenj gyaak caeuq gaijndei hong minzczu nem gij cingsaenz lwnghangj youqgaenj ceihleix bien'gyaiq Siz Ginbingz cungjsuhgi, aeu doihaeuj hwnqguh Cunghvaz Minzczu ranz vunz ndeu guh sienqmeh ronghsien, dawzmaenh caezhoz couqmaenh bien'gyaiq, canjnieb hwngh bien'gyaiq, vwnzva nyinh bien'gyaiq, gij gwndaen leih bien'gyaiq, doxsaeb cungsaed bien'gyaiq, haicuengq hoengh bien'gyaiq, maenh guekfuengz ak bien'gyaiq, dox boiqhab hwngh bien'gyaiq, doinyoengx aen hengzdoengh hwngh bien fouq minz seizdaih moq ciuq yiengh ceiq ndei bae guh. Aeu laebndei aen gihci ciengzgeiz, aen gihci bingzgyaq, aen gihci doekguh,

guh saed guh saeq hong couqmaenh gij eiqsik Cunghvaz Minzczu ranz vunz ndeu. Gyavaq diuzcingj aen gapgyaq canjnieb dieg bien'gyaiq, haeujlaeg doihaeuj aen hengzdoengh "minzyingz giyez haeuj bien'gyaiq", hawj dieg bien'gyaiq gaijgwz hwnghfat miz "sam aen yiyi". Gyaak lwnghangj yenzgiu ceihleix bien'gyaiq, doigvangq cienzdoh saw vah guekgya doeng' yungh liuxliux, gangj ndei gij gojgaeq Cunghvaz Minzczu ranz vunz ndeu. Hopheux gijgwz gijdaenq gijyungbouxminz gyaak cwngcwz fuzrex, haeujcoengh bien'gyaiq hwnqguh aen hawsingz cungsim caeuq aenmbanj. Gyavaq cauhaeb segih yiengh doxsaed, haeujlaeg coihaeuj gak minzczu doxcunz doxgyau doxyungz "sam hangh dajveh" caeuq cauhaeb minzczu doxgiet baenaj. Dazyinx haeujcoengh dieg bien'gyaiq dajcauh aen bingzdaiz haicuengq maenhndei, gyaak hamjguek doxgyau doxgap, bangrengh hwnqguh henzgyawj minghyinh caezcaemh. Gyaak baihdindj dajveh caeuq caezcaemh couzveh boiqhab, comz rengz hung bae doihaeuj aen hengzdoengh hwngh bien fouq minz seizdaih moq.

Vangz Ningz naeuz, Yinznanz haeujlaeg doekguh gij cingsaenz cijsi youqgaenj caeuq gangjvah youqgaenj

mwh Siz Ginbingz cungjsuhgi gaujcaz Yinznanz, hopheux couqmaenh gij eiqsik Cunghvaz Minzczu ranz vunz ndeu, gaemndaet "aen bonghhamj ndeu" "sam aen dinghvi" "cauh guh buenz moq", haeujlaeg doihaeuj hwnqguh dieg guhyiengh minzczu doxgiet baenaj guek raeuz, haenqrengh guh aen hengzdoengh hwngh bien fouq minz, gyavaq dieg bien'gyaiq yamqdin doxbae, doihaeuj hwnqguh diegsuen canjnieb bien'gyaiq, cauhamq hwnqguh aen mbanj vuenyungz bien'gyaiq, dazyinx gak cuz vunzlai dingq dangj gangj, gyo-mbaiq dangj, riengz dangj byaij, guhbaenz aen buenz ndei bouxminz bien'gyaiq miz, dieg bien'gyaiq gyaeu, bien'gyaiq onj, bien'gyaiq maenh. Aeu haeujlaeg doihaeuj aen hengzdoengh hwngh bien fouq minz seizdaih moq, dajcauh swnggaep aen mbanj vuenyungz bien'gyaiq, coihaeuj bien'gyaiq mbanj, cin, singz caeuq goujan, diegsuen dox boiqhab hwnghfat, hawj dieg bien'gyaiq canjnieb caeuq gyaeuvunz gietcomz engq ndei, hwnqguh ndei aen suenranz gyaeunde, henhoh ndei minzczu doxgiet, hensouj ndei diegguek.

(daj Guekgya Minzveij Vangj aeu daeuj genj hoiz)

## Gvangsiah Buedroengz Gij Ngaenz-cienz Roengzgoek Hwnqguh Giek-daej Cunghyangh 19.11 Ik Maenz

4 nyied 25 hauh, Swcigh Caizcwngdingh lwnh vunzlai rox, Gvangsiah mboengqneix laebdaeb buedroengz gij ngaenzcienz roengzgoek hwnqguh giekdaej cunghyangh 19.11 ik maenz, yungh daeuj baujcaeng yihliuz, gyauyuz, suijli doengh gij aen gvaengx hanghmoeg hungnaek roengzgoek hwnqguh aeuyungh, coenghrehnz Gvangsiah onjdingh roengzgoek demlai rengzlaeng. Ndaej daengz caizcwng coenghrehnz, geiqdoh daih'it, daengx gih guding swhcanj roengzgoek (mbouj baugvat nungzhu) doengzbeij lai hwnj 5.4%.

Mboengqneix buedroengz gij ngaenzcienz roengzgoek hwnqguh giekdaej cunghyangh gujsuenq 19.11 ik maenz, cujyau haeujcoengh gvaengx baihlaj guh hanghmoeg: Haeujcoengh daengx aen fugsah veiswng yihliuz yiengh ceiq ndei cienhangh 6.31 ik maenz, ciemq 33.02% ; caemhyamq doihaeuj guh aen hanghmoeg Cunghsan Dayoz Fusuz Daih'it Yihyen Gvangsiah Yihyen, Gvangjcouh Si Mehmbwk Lwngyez Yihliuz Cunghsinh Liujcouh Yihyen, Yilinz Si Cunghyih Yihyen laeuzndeidauq doengh gij saeh neix, san deih san maenh aen muengx fuengzhoh gunghgung veiswng, hawj

gij bonjsaenh fugsah giekdaej sezsih yihliuz veiswng Gvangsiah lai ak. Haeujcoengh aen gunghcwngz hwnqguh giekdaej sezsih gyauyuz ak guek cienhangh 5.01 ik maenz, ciemq 26.22% ; haeujcoengh hwnqguh hag-dangz laeuzdozninz, laeuzcunghab, dieggiek caengh lienhguh, gaijndei diegyouq dieghag lauxsae hagseng, canjnieb caeuq gyauyuz doxyungz guhndei gyauyuz boiqdauq giekdaej sezsih. Suijli suiyyin cienhangh 5.23 ik maenz, ciemq 27.36% ; yungh daeuj guh aen gunghcwngz ceihleix donh dah, cingjceih re raemxrongz baiz raemxrongz, caeuq hopheux aen gunghcwngz Gyauzbwzhaj Dezsanhgangj gaep 20 fanh dunh hangzdau doengh gij hanghmoeg neix, hawj hong suiqli re cai gemj cai ndaej raenhamq, cukmaenh fajciengz re raemxrongz, caemhcaiq gyavaq hwnqguh rangh ginghci Dahyinh Bingzluz, doinyoengx diuz roen moq baihsae doeng haij gya ndei demndaiej. Aeu hong lawh gouq cienhangh 2.56 ik maenz, ciemq 13.40% ; cujyau haeujcoengh hanghmoeg aeu hong lawh gouq giekdaej sezsih baugvat roen lajmbanj, suiqli daengj, hawj vunzlai ceiq noix miz hong guh.

(Huz Daiveij)



### Lozcwngz:

### Boux Ciengx Nonsei Gai Reh Baenz Ngaenz

4 nyied 25 hauh, youq Lozcwngz Mulaujcu Swciyen Vaizginz Cin Segih Mbanjhawmoq, vunzlai cingq gip reh. Geij bi neix daeuj, Lozcwngz Vaizginz Cin lai son vunzlai baengh gohgi ciengx nonsei lai baenz reh. Seizneix daengx cin ndaem gosangh 2500 lai moux, bi guj baenz reh 11 fanh lai goenggaen, ciuq hangzgyaq sou goenggaen 66 maenz baedauq suenq, daengx cin dan ndaem gosangh ciengx nonsei bi couh miz 726 fanh maenz doxhwnj, hawj bouxguhnaz lai miz ngaenz roengz daeh.

(Se Sunhwngh ingi)